

**Ն. Ա. Օ. Տ. Տ. ՊԱՐԵՎԻՆ Բ. ԱՄԵՆԱՅՆ ՀԱՅՈՑ ԿԱԹՈՂԻԿՈՍԻ  
ՊԱՏՎԱՍԸ ՈՒԽՏԱՎՈՐՆԵՐԻՆ**

(18 դեկտեմբերի, 2025 թ.)

*Սիրելի՛ զավակներ Մեր,*

Հայրապետական սիրով եւ օրհնությամբ ողջունում ենք ամենքիդ Մայր Աթոռ Սուրբ Էջմիածնում: Այսօր դուք հավաքվել եք հայոց հոգեւոր կենտրոնում՝ վկայելով ձեր սերը հանդեպ Առաքելական մեր Սուրբ Եկեղեցին: Սուրբ Էջմիածինը ամենքիդ տունն է, հարազատ հոգեւոր օրրանը ամեն մի հայի: Ինչպես պատմիչ Առաքել Դավրիժեցին է վկայում, հայոց ազգը ի սփյուռս աշխարհի կապված է Լուսավորչի Աջին եւ Սուրբ Էջմիածնին:

Մայր Աթոռ Սուրբ Էջմիածինը Աստծո հետ մեր ժողովրդի հավերժական ուխտի խորհրդանիշն է: Աստվածակառույց Սուրբ Էջմիածինը աշխարհասփյուռ հայոց ազգի միաբանության, մեր ինքնության ու ժառանգության պաշտպանության, մեր հավատքի պայծառության անխորտակելի սրբությունն է: Ցավոք, պատմության հոլովույթներում եղել են նաեւ ուժեր, որոնք ձգտել են կասկածի տակ առնել Եկեղեցու առաքելությունը, ծառայեցնել Եկեղեցին, Սուրբ Էջմիածինը տարատեսակ նեղ շահերի: Այդ մերժելի իրողությունը բաժանումներ է առաջացրել ներազգային կյանքում, մասնատել մեր ժողովրդին եւ տկարացրել ու թուլացրել մեր պետությունը՝ ըստ Տիրոջ խոսքի կանգնեցնելով կորստաբեր վտանգի առջեւ. «Ինքն իր մեջ բաժանված ամեն թագավորություն ավերվում է, եւ ինքն իր մեջ բաժանված ամեն քաղաք կամ տուն կանգուն չի մնա» (Մատթ. 12.21): Այսօր էլ տագնապալի օրեր ենք ապրում: Մեր երկիրը գտնվում է անվտանգային խնդիրների եւ հրատապ լուծման կարոտ լրջագույն հիմնահարցերի առջեւ: Այս պայմաններում, փոխանակ հանրության մեջ հաշտության, հանդուրժողության, միասնության ոգին զորացնելու, Եկեղեցի-պետություն խաթարված հարաբերությունները վերականգնելու, ընդհակառակը, շարունակվում են հարձակումները մեր Սուրբ Եկեղեցու դեմ: Սուրբ Էջմիածնի հանդեպ ոտնձգության հերթա-

կան փորձը կատարվեց այսօր, ցավոք, նաեւ մեր որոշ եկեղեցականների միջոցով, սակայն հավատավոր մեր ժողովրդի զավակները մնում են աներեր եւ աներկյուղ: Այս աղմուկը երբեք չի կարող խաթարել տերունապատվեր մեր առաքելությունը, մեր ծրագրերը, որոնք կոչված են մեր երկրի շինության համար:

Հայրապետական Մեր գնահատանքն ենք բերում ձեզ, սիրելիներ, եւ բոլոր հայորդիներին, ազգային կազմակերպություններին, որոնք տարիներ շարունակ, ինչպես նաեւ հակաեկեղեցական արշավի այս օրերին իրենց զորակցությունն են ցուցաբերում Մայր Աթոռ Սուրբ Էջմիածնին եւ մեր Սուրբ Եկեղեցու ազգօգուտ առաքելությանը: Մեր գնահատանքն ենք բերում Մայր Աթոռի միաբանությանը, թեմերում սպասավորող քահանաներին եւ սիրելի սարկավազներին, որ հաստատուն եւ վճռական են մեր Սուրբ Եկեղեցու կանոնական իրավունքների պաշտպանության դիրքերում: Մենք բոլորս էլ ցանկանում ենք, որ մեր կյանքը լինի գերծ անօրինություններից, անարդարություններից, որոնց դառը հետեւանքներն են կրում ապօրինաբար ազատազրկված մեր հոգեւորականները, ազգային մեծանուն բարերարը, նվիրյալ հայորդիներ: Փափագում ենք, որ մեզանում թագավորեն բարությունն ու գթասրտությունը, եղբայրսիրությունն ու համերաշխությունը: Մենք մեկ ազգ ենք, մեկ հայրենիք, մեկ Եկեղեցի, եւ չպետք է տրվենք երկպառակության սաղրանքներին: Միավորվենք բոլորս հայրենիքի եւ մեր Սուրբ Եկեղեցու շուրջ: Պահպանենք մեր միաբանությունը, որով միայն կարող են զորավոր լինել մեր պետությունը եւ Եկեղեցին՝ Քրիստոսահիմն Սուրբ Էջմիածին կենտրոնով: Հոգեւոր ասպարեզում առկա խնդիրները լուծվում են եկեղեցական կանոնական ընթացքներով եւ ոչ առանձին խմբերի պարտադրանքներով կամ հակականոնական քայլերով: Հորդորում ենք խոտոր ընթացքի մեջ եղող մեր Սրբազան Հայրերին վերագառնալ կանոնական դաշտ եւ գործել միայն մեր Սուրբ Եկեղեցու նվիրական կարգաց համաձայն՝ ի սեր մեր ժողովրդի եւ հայրենյաց: Սիրելի բարեպաշտ ժողովուրդ, Հայրապետական Մեր հորդորն է՝ ներկա զգայուն կացության մեջ ցուցաբերել սթափություն, լինել ողջախոհ եւ շենթարկվել որեւէ սաղրանքի: Առաքյալի խոսքով պատգամում ենք ամենքիդ. «Արթուն կացեք, հաստատուն մնացեք հավատի մեջ, քաջ եղեք, զորացեք: Ձեր ամեն ինչը սիրով թող լինի» (Ա Կորնթ. 16.13–14):

Միասնաբար հայցենք, որ Տիրոջ խաղաղությունը հաստատվի աշխարհում, ապահով ու անխռով լինեն մեր հայրենիքն ու աշխարհասփյուն ժողովուրդը՝ միշտ առաջնորդվելով Սուրբ Էջմիածնից ճառագող աստվածապարզեւ հույսով, հավատով ու սիրով:

Մեր Տեր Հիսուս Քրիստոսի շնորհները, սերը եւ խաղաղությունը թող լինեն մեզ եւ ամենքի հետ այսօր եւ միշտ եւ հավիտյանս. ամեն:

